

徐州

明清十人文萃·阎尔梅集



〔明〕阎尔梅^著
龚逢庆^编

（下）

中国文史出版社

徐 明
明清十人文萃· 阎尔梅集



〔明〕阎尔梅 著

龚逢庆 编

（下）

中国文史出版社

图书在版编目(CIP)数据

野望 / (明) 阎尔梅著 ; 龚逢庆编. — 北京 : 中国文史出版社, 2017. 1

(徐州明清十人文萃)

ISBN 978 - 7 - 5034 - 8486 - 5

I. ①野… II. ①阎… ②龚… III. ①古典诗歌 - 诗集 - 中国 - 明代 IV. ①I222.748

中国版本图书馆 CIP 数据核字(2016)第 267334 号

责任编辑: 马合省 薛媛媛

出版发行: 中国文史出版社

网 址: <http://www.chinawenshi.net>

社 址: 北京市西城区太平桥大街 23 号 邮编: 100811

电 话: 010 - 66173572 66168268 66192736 (发行部)

传 真: 010 - 66192703

印 装: 北京盛彩捷印刷有限公司

经 销: 全国新华书店

开 本: 720 × 1020 1/16

印 张: 49.5 字数: 811 千字

版 次: 2017 年 1 月第 1 版

印 次: 2017 年 1 月第 1 次印刷

定 价: 98.00 元

文史版图书, 版权所有, 侵权必究。

文史版图书, 印装错误可与发行部联系退换。

卷十九

诗·近体·七律

汧口草堂读史诗^①有序

《后汉书》有扶风马瑶隐汧山，以免置为事，学者称马牧先生。余心好其人，取以名堂。堂创于庚寅^②五月，至九月落成，故诗中多夏秋景物。凡三十首，依上下平韵^③。

平沙疏树晓眈眈，披剪荆茅植桂桐。郭泰辞征虚有道，田畴抗节隐无终。稽迟婚嫁愁经费，顾惜行藏耻送穷。更考逸民删作伴，不须牛侩辱墙东。

二

炎天节序似秋冬，菓^④蒂先凋落叶重。黄水半沈官道柳鲁选云：是年，邑中大水，白云环锁墓堂松。江东王气留司马，海外神山戏祖龙。经户无人闻见寡，西林孤寺一声钟。鲁选云：五、六不解所谓。

① 兹题张本录三十首；康熙本、光绪本俱录一、二、六、八、十三、十五、十八、二十、二十一、二十五、二十六、二十七、二十九计十三首，其十四、十五、十六为张本本题所不录，兹列于下：十四·不事王侯岂自尊，衰年退步喜幽村。移家偶卜三枝墅，谢客常关五柳门。击筑儿童陪杖履，吹箫将相炙鸡豚。东园簇簇新篁发，大雨时行掘数墩。十五·空天野鹤任伶仃，返舍依然是客星。甘饿不情犹忘岁，偷闲无谓且穷经。南瞻蛇泽云飞赤，北枕鳧山雨浴青。欲卧高楼终是懒，危梯难上上还停。十六·当时说剑学纵横，此日扈羸一老生。海上神仙空扰事，山中宰相止沽名。长贫不待年终课，勇退何劳月旦评。斗酒双柑殊有会，天然律吕是鹂笙。鲁选本录一、二、六、十五、二十暨康熙本之十五、十六计七首。醪公按：兹三首张本录入《西庄杂咏》。

② 张本作“庚寅”；康熙本、光绪本、鲁选本俱作“癸未”。

③ 张本作“凡三十首，依上下平韵”；康熙本、光绪本、鲁选本俱作“凡十六首”。

④ 张本、康熙本俱作“菓蒂”；光绪本、鲁选本作“果蒂”。

三

鹧鸪蛙鼓奏双双，门设尝关竹半窗。石笋难开敲木钥，铜盘乍徙哭金幢。淮南客去谁招隐，朔北城空未受降。记得当时端午节，飞云桥下斗龙艘。

四

窗禽野鹜各知时，不似吾侪去就痴。海市看云消作水，山田种豆落为萁。经天日月终如故，避地渔樵莫问谁。怪杀西洋蛮太史，玠衡颠倒列参髻。西洋历以背参为参髻，乃利玛窦徒汤若望杜撰。○礪公按：此其四暨其五、九、十、二十二，鲁选本另题作《续读史》。

五

长夏烟林罨翠微，良苗雨后绿毵毵。厘功须是求田少，远害何妨结客稀。贾傅著书秦可过，延陵观乐郤无讥。桃花源路人人有，更外寻之即便非。

六

荒天何处卜蜗庐，贺者门兮吊者闾。乱世屠沽皆将相，先民春夏独诗书。园中留客蔬堪剪，花下论文酒自储。顾此栖迟愁未稳，终当卖去买篮舆。

七

皤然老矣坐穷途，棚锈当年金璞。一夕国君从社稷，十年妻子饿江湖。诸侯带砺度刘尽，原庙松楸尺寸无。独我随身桃竹杖，登峰全不借人扶。

八

太白东来大火西，登高野望远天低。星飞宿鸟随光动，月落寒蝉顾影啼。诗变而骚哀屈宋，史分为传首夷齐。休言鸛鹄无知觉，不向刘骥陇树栖。

九

广武原头泪未揩，悲歌生起战场骸。披裘男子移星去，荷锸参军用酒埋。冻熟长腰行路米，编成多耳上山鞋。肌肤微冷知秋尽，霜露园陵伊可怀。

十

泠泠疏雨濯莓苔，新绿丛蓊不用栽。云岫隐从千里见，林花分逐四时开。山招隐士才生桂，里驻仙人即姓梅。说向外间成怪诞，此中谁肯避秦来？
鲁选本此处作“遽轻”来？

十一

蒲席蒹帘纸障尘，十三经内可藏身。山川容有头飞事，坟典能欺耳食人。南岳先生云作饭，东篱处士酒为巾。从来不信天曾醉，鹑首无端径赐秦。

十二

奇峰巧绘暑天云，返照明窗石鼓文。泗水风来争九鼎，微山雪霁考三坟。田间秫秫随时种，海内龙蛇望气分。问道狼居胥绝顶，至今犹刻汉将军。

十三

松炉瓦牖薜萝樊，满架虫书逐策翻。茂远一生尝闭户，仲舒三载不窥园。霜天鬼梓成妖牯，月夜神桑泣老鼋。心赏前人多韵事，闲图阮籍遇苏门。

十四

笊笠手植数千竿，凤尾翛翛拂药栏。索虏不妨成北史，琴工犹未改南冠。黄河渡马平林啸，白水从龙大树寒。毋论谁庭兵许借，孤臣何惜泪阑珊？

十五

百本梨桃水一湾，茅茨新构两三间。旧家王谢偏怀土，多事巢由更买山。孤卧始闻栖鸟乱，野居惟有种花闲。西风萧瑟无^①秋夏，髭发劳人夜夜斑。

十六

愁将椎结剃金钱，海内多增隐士禅。盐骥长鸣悲枥下，鞲鹰疾视出天边。三秋好雨来何暮，万里中华去几年？醉石堪眠乌用醒，东篱绝不换平泉。

十七

桐实离离缀绿瓢，惊秋一叶响萧萧。花飞僧扫双林寺，酒散人归独木桥。映户有帘垂薜荔，临书无纸荫芭蕉。寻尝对客多乖误，痛饮狂歌涕本朝。

十八

著得同人第几爻，不能于野但于郊。逢时小饮家藏酒，饭客多寻土产

^① 张本作“无秋夏”；康熙本此处蠹蚀莫辨；光绪本作“经秋夏”；鲁选本作“悲秋夏”。

肴。菡萏风香千叶里，藤萝云绣百花梢。只今谁可偕藏者，去去无烦续绝交。

十九

空上绥山得一桃，归来犹自隐蓬蒿。寻思临济三回棒，解会华亭两次篙。每恨南军装薏苡，不闻西域贡葡萄。冰梨金柿连秋井，步履闲吟听桔槔。三棒、两篙，事出《传灯录》。

二十

闲闲持斧白云阿鲁选本此字作“柯”，棋未曾终已烂柯。老去行吟枯树赋，悲来起舞大风歌。长门日莫佳人远，空谷年深捷径多。岂不能辞贫贱客，蹙然无奈足音何。

二十一

桑田空出是蒹葭，隔断垂杨一径斜。架上春培山药豆，墙阴秋种海棠花。逋臣解剑酬渔父，处士挥钱付酒家。读史心伤晁错传，才知文帝惜长沙。

二十二

村东一夜雨平塘，风露葳蕤黍稻香。原宪不将贫作病，儿宽真是醒而狂鲁选云：“醒而狂”，乃盖宽饶事，先生恐误记。通父。兵戈满地群飞鸱，弧矢垂星懒射狼。往者欽歔南渡事，如今何处得齐梁？儿，音倪。鸱，一名寇雉。

二十三

江海悲歌不自明，穷愁激发出金声。山中高士生求死，天下奇才死走生。黑水直西开四郡，黄河迤北筑三城。追思往事无人信，却笑空谈纸上兵。

二十四

芳翠芝兰秀户庭，萧然窗几坐传经。匣中双剑星边紫，湖外千山雨后青。良士劬劳吟蟋蟀，美人迟莫想榛苓。牢骚更作兴亡辨，误国庸臣服上刑。末句指宜兴、乌程辈。

二十五

跌坐闲参大小乘，与其魑结不如僧。试看麟阁图苏武，应悔龙门救李陵。晓露光华松五粒，秋烟暖澹竹三棱。人生最苦眠长夜，努力空林续旧灯。

二十六

潦注经旬苦未休，嘉田陨落不成秋。烟霞结侣青鞋绽，草莽称臣白帽

羞。里社云闲歌兔首，湖村霜老荐鸡头。行将快意佳山水，何得宗生仅卧游？

二十七

斗室蹒跚抱膝吟，空阶露洗不弦琴。归云渡岭千峰走，宿雾笼村四野沈。吴苑美人歌白苧，汉廷廉吏作黄金。谁能留得繁华住^①，一夕枯霜叶满林。

二十八

终岁樵薪未释担，双桥枫叶响澄潭。清秋野色无边绿，初霁天光分外蓝。几见王庭空幕北，徒闻乐府战城南。山公洵是虚怀者，其奈嵇生自不堪。末句指溧阳。

二十九

雨沐秋空月色严，山河影入桂花奩。良农带索晨于耜，贫士挑灯夜织帘。醉酒光如金掌露，吟诗味似水晶盐。悟来生死俱游戏，何用旁寻季主占？

三十

茂草周行鞠未芟，出门随地有巉岩。莲峰玉女头堪洗，稷庙金人口正缄。持节终当还故国，酬书何至达空函？堂前燕子辞秋去，飞顾泥巢不住喃。

答陈百史

时为清吏部左侍郎。

海外生还九死余，先慈未葬故踌躇。绝无世上弹冠想，徒有年来却聘书。伏腊不关新晦朔，湖山犹访旧樵渔。侍郎休问田园事，先帝宫陵亦廐墟。鲁选云：“海外”句，谓东走庙湾也。

二

放废苦茨学种蔬鲁选云：玩此句则诗为乙酉年作，劳君频寄欲何如？逢萌应诏还迷路，矫慎逃名不报书。清夜闻钟呼客梦，空山结屋傍僧居。当时

^① 张本、光绪本俱作“繁华住”；康熙本作“繁华注”。

风雨鸡鸣约，二十年来岂尽虚？

三

未必长安好僦居，五云堂下即穹庐鲁选本此处作“蓬庐”。谁无生死终难避，各有行藏两不如。龚胜坚辞新室组，臧洪迟复故人书。寥寥此意期君解，拊拾还来共鹿车。五云堂，即北都翰林院旧名也。百史仍居其中，故云。

过杨封卿竹墅

茅亭拳大木皮墙，犍瘦田饶一半荒。纳稼无多尝是秫，缫丝有待且培桑。三秋积雨藤垂壁，十月停云竹满塘。离乱幽栖寻乐事，村醪浮得海螺香。

却公车一首

时邑令为王半石。

寂寂孤村满径蓬，霜天何处好音通。铜驼久已埋秦苑，金马谁为诏汉宫？卧病樵林千树月，读书僧寺一帘风。科头款谢梅花使，泪到琴堂雪尽红。

再答百史

四野霜高不可尘，孤峰天外有谁邻？歌来恐复如狂疾，泣下嫌其类妇人。已见沧洲沈义士，何妨洛邑恕顽民？只今惟独君知我，莫遣渔郎屡问津。

王半石来候遂招饮歌风台

半石，讳克生，丙戌进士，阳城人。

璃泉秋夜发金声，灯火光摇射满城。客向桐庐寻仲若，官来栗里候渊明。风云气散歌谁赏，钟鼎碑残搨不平。非士非僧先醉去，粉榆社里旧狂生。《大风歌》碑是蔡邕钟鼎文，最古。

除夕大雪灵□携新酿至肇□堂共我过

岁遂为竟夜之欢作此志之^①

除夕烘薪冷倍常，六花旋舞肇裡堂。冬官向晦留青署，春帝承明发素光。玉屑葳蕤霏烂熳，冰鳞闪烁结锋铓。埙篪应节东风里，酣到晨钟乐未央。

三答百史

时为冢宰。

落落生平耻受恩，甘为寡合住秋村。每当花发尝沽酒，犹恐人来独闭门。邴子无书酬北海，留侯何事苦东园。闲云过去相忘好，莫使空山有挂痕。鲁选云：收语可谓决绝，想见人品之峻。

二

三过平陵非偶然，山亭久已刻来贤。科名得意交游重，国步伤心出处悬。旧社遗忘如幻梦，新诗感触作愁缘。闲时每痛河梁句，临到吾侪更可

^① 兹题康熙本录之；光绪本、张本不载。

怜。来贤亭，在溧阳城西强埠，其乡人为余创者，即百史家居。

濮州叶润山见访次韵

润山，讳廷秀，乙丑进士，官户部郎，国变遁去。^① ○鲁选云：润山曾仕唐王，至侍郎。事败为僧，故有第七、八句。○据张谱，己亥，山人称蹈东和尚，至河南少林寺，寺僧异之，不敢留。徘徊历时，复归于沛，杜门谢客，惟叶润山素冠相访。

十五年来问讯重，春斋鸡黍薄言供。幽芳懒与人相近，高蹈孤为众所宗。避地黄冠时驾鹿，经天紫气果犹龙。村童不解游方外，便为敲鱼待饭钟。公时为羽士装。○鲁选云：则此诗当系己亥年。

游南寺次润山韵

芒鞋竹杖入东林，一坞桃花万树深。荒水漫缘孤柳渡，微行多被野藤侵。须知慧远能沽酒，未必渊明不解琴。烟雨满楼晨夕幻，蒲团牛背总违心。行，音杭。^②

① 此题注及诗后小注张本录之；康熙本、光绪本、鲁选本不载。

② 此小注康熙本录之；张本、光绪本不载。

中秋张崇者李玉弢见访作此励之^①

村居衫履半蒙戎，削^②枣南园八月中。花社久荒生翠薜，草堂新构植青桐。云山坐老观棋叟，甲子书残漉酒翁。户外寒暄无可问，疏林樵牧各^③西风。

二

薄暮阴云鼓吹开，明河金露闪苍苔。虫声悲壮劳人息，斗色精华宝剑来。比兴义深时削稿，衣冠藏久欲生煤。丈夫亲厚如苏李，歧路临风绝可哀。

三

疏懒生成苦未医，凉秋怀抱更支离。天哀孝妇三年旱，山畏愚公一夜移。休咎岂容人代决，行藏毋使后难追。同乡砥砺多贤者，青简悠悠肯恕谁？

四

耕野栖山道路长，求全终恐误行藏。三田有客争沧岛，二陆何心宦洛阳？始信高人能志气，非如名士仅文章。明珠持赠芳兰佩，风雨鸡鸣莫更商。

答龚孝升五首^④

时自都门南下，以诗投我。

卧病霜岩枕药簏，嵯峨归路几时平？但期苟活姑长往，虽处穷途敢倒

① 兹题张本作“中秋张崇者李玉弢见访作此励之”，录诗四首；康熙本、光绪本、鲁选本俱作“中秋张崇者李玉弢见访”。康熙本、光绪本止录其一；鲁选本录其三、四两首。

② 张本作“削枣南园”；康熙本、光绪本俱作“剥棗南园”。

③ 张本作“疏林樵牧各西风”；光绪本作“疏林樵牧唱西风”；康熙本作“疏林樵牧歌西风”。醪公按：康熙本误矣。

④ 兹题张本作“答龚孝升五首”；康熙本、光绪本俱作“答龚孝升二首”；鲁选本作“答龚孝升”，三家均录其一、二两首，且不载题注。

行。夜静江枫闻叹息，秋深山鬼瞰高明。桃花满岸无人到，渔父初来第一声。鲁选云：此诗当在丙戌岁。时陈百史尚未聘山人也，故有末句。

二

万死余生守敝簏，毋将休咎质君平。家移橘子枰中住，人在梅花市里行。别有衣冠非近见，疑传踪迹故难明。天高雁度^①留空响，迟和阶前落叶声。

三

金斗江空笑宦簏，双鱼南报近嘉平。有怀安用深相愧，无路何妨各自行。元直曾云方寸乱，子长终为故人明。可怜凝碧池头句，读罢伤心哭几声。京师破，时孝升二亲具庆，故第五句及之。

四

三年穷饿一书簏，恸哭离骚伴屈平。鼋屿犹存昭代朔，蜎台谁使汉官行。披裘有志毋相迫，吞炭何心未敢明。回忆萧萧寒水处，悲歌燕市久无声。鼋鼍屿，在琉球国西大海中。蜎台，在故东京城北隅。

五

霞光笺出薛家簏，便道青门访邵平。鸿雁一天秋水浴，芙蓉两岸美人行。云移村树峰皆变，烟冷江楼月更明。相见欲言言不得，不如遥寄各吞声。时孝升携顾眉南下。

吴嵩三自淮至沛过我豹韦堂次韵

荻隐鱼罾雪隐舟，孤松利落缀苍虬。百年狂疾谁为疗，一往空山不可留。鹿苑有僧同结夏，龙城无主罢防秋。当时未解经历乱，迟莫谈兵已白头。

^① 张本作“雁度”；康熙本、光绪本、鲁选本俱作“雁渡”。

再谢公车答半石

时为丁亥春莫，余将他适矣。

江野蒲烟四望深，新篁满苑袭花阴。湖山或有相容地，沟壑难埋不死心。马牧先生置网破，羊裘男子钓竿沈。他乡岂必无悲感，犹胜离骚滞楚吟。

二

白驹空谷影相疑，出处违心我自悲。既谢公车应便去，还留故土欲何为？鹿门栽树环精舍，鹃血啼花上老枝。凭谢使君无一语，歌台桑梓岷山碑。

夜宿湛若僧舍

人烟尽处竹林幽，冷月^①禅灯一气秋。才梦湖山归去好，忽闻钟磬觉来愁。云旗^②远驾思江芷，霜笛高吹动戍楼。长夜西风萧飒甚，黄花几瓣剩篱头。

次张崇者处士韵即以赠之

深柳丛塘竹半轩，湖村如画立冰鸳。秋光澄澈伊人沚，夜象昭回处士垣。钟吕八音依泗磬，圭璋五色琢昆璠。辽东不是当年路，浮海无从问邠原。

① 张本作“冷月”；康熙本作“冷日”。

② 张本作“云旗”；康熙本作“云旂”。

二

身将隐矣更何愁鲁选本此处作“何求”，万里来归恸首丘。几次丧家空类狗，今兹垂钓欲驯鸥。孤儿不死亏韩厥，邻国无盟诺仲由。与尔偕藏深愧尔，年年五月一羊裘。

答朱含朴馈药

讳生光，沛庠生。^①

阴阴柱础晓含滋，欲解炎疴汲上池。非是人间多善病，只缘海内总无医。秋夫针诀疑仙授，涓子方书号鬼遗。药物笼中君已备，重编本草序韦师。

二

少年儒者老医王，海外逢仙去故方。诊有四难劳郭玉，药无二价重韩康。深山静悟熊经理，禁苑微闻獭髓香。同病相怜君惠我，全开金匱^②涤膏肓。

李又公孝廉以书来候答之

又公，讳狄门，峰县人。

年来无复有行藏，蓬垢酣呼事事荒。懒极应酬惟草率，愁多书札每遗忘。椎沙震走关中鹿，握节驱还塞北羊。迟着一鞭君自爱，犍嶂高卧饮沧浪。抱犊山，在峰城东，一名君山。沧浪渊，在峰城北。

① 此题注张本录之；康熙本不载。

② 张本作“金匱”；康熙本作“金柜”。